

**Կ Ա Ն Ո Ն Ա Դ Ր Ո Ւ Թ Յ Ո Ւ Ն**  
**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՏՆՏԵՍԱԿԱՆ ԶԱՐԳԱՑՄԱՆ ԵՎ**  
**ՆԵՐԴՐՈՒՄՆԵՐԻ ՆԱԽԱՐԱՐՈՒԹՅԱՆ ԵՎՐԱՄԻՈՒԹՅԱՆ ՀԵՏ**  
**ՀԱՄԱԳՈՐԾԱԿՑՈՒԹՅԱՆ ՎԱՐՉՈՒԹՅԱՆ**

**I. ԸՆԴՀԱՆՈՒՐ ԴՐՈՒՅԹՆԵՐ**

1. Եվրամիության հետ համագործակցության վարչությունը (այսուհետ՝ վարչություն) հանդիսանում է Հայաստանի Հանրապետության տնտեսական զարգացման և ներդրումների նախարարության (այսուհետ՝ նախարարություն) հիմնական մասնագիտական կառուցվածքային ստորաբաժանում և իր գործունեությունն իրականացնում է Հայաստանի Հանրապետության օրենսդրության, նախարարության կանոնադրության, Հայաստանի Հանրապետության տնտեսական զարգացման և ներդրումների նախարարի հրամանների, ինչպես նաև սույն կանոնադրության պահանջներին համապատասխան:

2. Վարչությունն իր իրավասությունների շրջանակներում պատասխանատվություն է կրում իր առջև դրված խնդիրների և գործառույթների ժամանակին ու պատշաճ իրականացման համար:

3. Վարչության կանոնադրությունը հաստատում, փոփոխում և ուժը կորցրած է ճանաչում նախարարը՝ նախարարության գլխավոր քարտուղարիներկայացմամբ՝ նախապես համաձայնեցնելով վարչության պետի և համակարգող պաշտոնատար անձի հետ:

**II. ՎԱՐՉՈՒԹՅԱՆ ՀԻՄՆԱԿԱՆ ԽՆԴԻՐՆԵՐԸ**

4. Վարչության հիմնական խնդիրներն են՝

1) Հայաստանի Հանրապետության և Եվրոպական Միության միջև կնքված «Գործընկերության և համագործակցության մասին համաձայնագրի» (ԳՀՀ) տնտեսական մասի իրականացումը,

2) Հայաստանի Հանրապետություն-Եվրոպական Միություն «Համապարփակ և ընդլայնված գործընկերության համաձայնագրի»՝ առևտրին առնչվող դրույթների իրականացման աշխատանքների, ինչպես նաև համաձայնագրի ներքո Հայաստանի Հանրապետություն-Եվրոպական Միություն համագործակցության ապահովումը,

3) Եվրամիության կողմից Հայաստանի Հանրապետությանը տրամադրվող աջակցության համակարգումը, մասնավորապես՝ ֆինանսավորման համաձայնագրերի շուրջ բանակցությունների իրականացումը և համակարգումը, համաձայնագրերի շրջանակներում ստանձնած պարտավորությունների իրականացման ընթացքի դիտանցումը և գնահատումը,

4) Եվրոպական Միության կողմից Հայաստանի Հանրապետությանը տրամադրվող «Արտոնությունների ընդհանրացված և համալրված համակարգ» (GSP+) արտոնյալ առևտրային ռեժիմի արդյունավետ իրականացումը և դիտանցումը,

5) Եվրոպական Միության կողմից տրամադրվող «GSP+» արտոնյալ առևտրային ռեժիմի շրջանակներում արտահանման գործընթացների դյուրացման ապահովումը, «Գրանցված արտահանողների համակարգի» կիրառումը, համակարգում արտահանողների գրանցումը և առնչվող անհրաժեշտ բոլոր գործընթացների իրականացումը,

6) Եվրոպական հարևանության քաղաքականության շրջանակներում ծրագրերի իրականացումը, և այդ ծրագրերի մասով իրականացնում է Եվրոպական միության կառույցների հետ տարվող աշխատանքները,

7) Եվրոպական հարևանության գործիքների ներքո իրականացվող ծրագրերի դիտանցումը և համակարգումը,

8) Եվրոպական Միության համապատասխան կառույցների հետ համագործակցությունից և (կամ) անդամակցությունից բխող առևտրատնտեսական պարտավորությունների կատարումը,

9) Եվրոպական հարևանության գործիքի (ԵՀԳ) ներքո իրականացվող ծրագրերի համակարգումը և դիտանցումը,

10) Թվինինգ, Թայեքս, Սիգմա, Սևծովյան ավազանի երկրների անդրսահմանային համագործակցության ծրագրի և այլ գործիքների ծրագրային առաջարկների մշակման և հաստատված ծրագրերի կատարման աշխատանքների համակարգումը ու դիտանցումը,

6) ԵՄ Արևելյան Գործընկերության «Տնտեսական զարգացման և շուկայի հնարավորություններ» պլատֆորմի և վերջինիս ներքո գործող պանելների շրջանակներում իրականացված աշխատանքների համակարգումը,

7) ԵՄ Արևելյան գործընկերության շրջանակներում ծրագրերի և նախաձեռնությունների իրականացման ապահովումը,

8) ԵՄ-ի հետ իրականացվող համագործակցության ընդհանուր համակարգման ապահովումը:

### **III. ՎԱՐՉՈՒԹՅԱՆ ԿԱՌՈՒՑՎԱԾՔԸ**

5. Վարչությունը կազմված է հետևյալ բաժիններից.

- 1) Եվրամիության հետ համագործակցության բաժին
- 2) Եվրամիության ծրագրերի կառավարման բաժին

### **IV. ՎԱՐՉՈՒԹՅԱՆ ԱՇԽԱՏԱՆՔՆԵՐԻ ԿԱԶՄԱԿԵՐՊՈՒՄԸ ԵՎ ՂԵԿԱՎԱՐՈՒՄԸ**

6. Վարչության կառուցվածքն ու հաստիքային ցուցակը հաստատում է նախարարը՝ նախարարության գլխավոր քարտուղարի ներկայացմամբ՝ նախապես համաձայնեցնելով վարչության պետի և համակարգող պաշտոնատար անձի հետ:

7. Վարչությունը՝

1) իր իրավասության շրջանակներում կազմակերպում և իրականացնում է աշխատանքներ՝ համագործակցելով նախարարության այլ ստորաբաժանումների, Հայաստանի Հանրապետության շահագրգիռ նախարարությունների և գերատեսչությունների, ինչպես նաև միջազգային կազմակերպությունների հետ,

2) ներկայացնում է հաստատման վարչության ծրագրերը, ինչպես նաև ապահովում է դրանց կատարումը:

8. Վարչության աշխատանքների ղեկավարումն իրականացվում է վարչության պետի և բաժինների պետերի կողմից:

9. Վարչության պետը՝

1) իրականացնում է վարչության աշխատանքների կազմակերպումը և ընդհանուր ղեկավարումը,

2) պատասխանատու է վարչությունում համապատասխան աշխատանքային մթնոլորտի և կարգապահության ապահովման, վարչությունում աշխատողների միջև աշխատանքային հավասարաչափ բաշխման և դրանց կատարման համար,

3) բացահայտում, վերլուծում և գնահատում է վարչության առջև դրված գործառույթներից բխող մասնագիտական նշանակության խնդիրներ, ինչպես նաև դրանց տալիս է ստեղծագործական և այլընտրանքային լուծումներ կամ ապահովում այդ աշխատանքների կատարումը,

4) անմիջական հաշվետու է նախարարին:

## **V. ՎԱՐՉՈՒԹՅԱՆ ԲԱԺԻՆՆԵՐԻ ԳՈՐԾԱՌՈՒՅԹՆԵՐԸ**

10. Եվրամիության հետ համագործակցության բաժնի գործառույթներն են.

1) ԵՄ-ի հետ իրականացվող համագործակցության ընդհանուր համակարգման ապահովում,

2) Հայաստանի Հանրապետություն-Եվրոպական Միություն «Համապարփակ և ընդլայնված գործընկերության համաձայնագրի» ներքո գործող Առևտրի հարցերով կոմիտեի նիստերի կազմակերպման, անցկացման, նիստերի շրջանակներում ձեռք բերված պայմանավորվածությունների իրականացման ապահովում,

3) Եվրամիության կողմից Հայաստանի Հանրապետությանը տրամադրվող աջակցության շրջանակներում ֆինանսավորման համաձայնագրերի շուրջ բանակցությունների իրականացման և համակարգման, համաձայնագրերի

կնքման և վավերացման/հաստատման, համաձայնագրերի շրջանակներում ստանձնած պարտավորությունների իրականացման ընթացքի դիտանցման և վերահսկողության ապահովում, համաձայնագրերի իրականացման շրջանակներում ինքնազնահատման զեկույցների պատրաստում,

4) Եվրոպական Միության կողմից Հայաստանի Հանրապետությանը տրամադրվող «Արտոնությունների ընդհանրացված և համալրված համակարգին» (GSP+) Հայաստանի մասնակցության և դրա հետ կապված դիտանցման գործընթացներին առնչվող աշխատանքների կազմակերպում և երկրի զեկույցի պատրաստում,

5) ԵՄ կողմից տրամադրվող «GSP+» արտոնյալ առևտրային ռեժիմի շրջանակներում արտահանման գործընթացների դյուրացմանն ուղղված աշխատանքների ապահովում, «Գրանցված արտահանողների համակարգի» կիրառում, համակարգում արտահանողների տվյալների գրանցում, տվյալների թարմացում և դիտանցում,

6) ԵՄ Արևելյան Գործընկերության «Տնտեսական զարգացման և շուկայի հնարավորություններ» պլատֆորմի համակարգման աշխատանքների իրականացում,

7) ԵՄ Արևելյան Գործընկերության «Տնտեսական զարգացման և շուկայի հնարավորություններ» պլատֆորմի ներքո գործող պանելների աշխատանքների համակարգում,

8) Մասնակցություն Հայաստանի Հանրապետությունում ԵՄ պատվիրակության գրասենյակի հետ իրականացվող համագործակցությունից բխող աշխատանքներին,

9) Եվրոպական Միությունում Հայաստանի Հանրապետության առևտրական կցորդի հետ համագործակցության կազմակերպում, համակարգման աշխատանքներին մասնակցություն:

11. Եվրամիության ծրագրերի կառավարման բաժնի գործառույթներն են.

1) Թվինինգ, Թայեքս, Սիգմա, Սոյու, Սևծովյան ավազանի երկրների անդրսահմանային համագործակցության ծրագրի և այլ գործիքների ներքո Հայաստանի Հանրապետությունում իրականացվող աշխատանքների համակարգում.

2) Աջակցություն Հայաստանի Հանրապետության պետական կառավարման մարմիններին Թվինինգ, Թայեքս, Սիգմա, Սոյու, Սևծովյան ավազանի երկրների անդրսահմանային համագործակցության ծրագրի և այլ գործիքների ներքո ծրագրային փաստաթղթերի մշակման և համապատասխան տեղեկատվության տրամադրման գործում

3) Թվինինգ, Թայեքս, Սիգմա, Սոյու, Սևծովյան ավազանի երկրների անդրսահմանային համագործակցության ծրագրի և այլ գործիքների ծրագրային առաջարկությունների ուսումնասիրություն, համատեղ մշակում և գնահատում.

4) Թվինինգ, Սիգմա, Սոյու և այլ ծրագրերի, ինչպես նաև Թայեքս միջոցառումների դիտանցման աշխատանքների և դրանց արդյունքների գնահատման աշխատանքների կազմակերպում.

5) Թվինինգ, Թայեքս, Սիգմա, Սոյու և այլ գործիքների ներքո Հայաստանի Հանրապետության պետական կառավարման մարմինների և ԵՄ համապատասխան փորձագետների հետ խորհրդակցությունների, աշխատաժողովների, ինչպես նաև ճանաչողական այցերի կազմակերպման աշխատանքների իրականացման համակարգում.

6) Սևծովյան ավազանի երկրների անդրսահմանային համագործակցության ծրագրի ու Հայաստան-Վրաստան տարածաշրջանային համագործակցության ծրագրի համակարգում, համապատասխան ծրագրային փաստաթղթերի մշակում և դրանց ներքո իրականացվող ծրագրերի դիտանցման ապահովում,

7) Սևծովյան ավազանի երկրների անդրսահմանային համագործակցության ծրագրի ու Հայաստան-Վրաստան տարածաշրջանային համագործակցության ծրագրերի գործընկեր պետությունների հետ հանդիպումների, նիստերի, շահառուների հետ խորհրդատվությունների ու վերապատրաստումների

կազմակերպում, համակարգող մարմինների հանդիպումներին մասնակցության ապահովում.

8) Եվրամիության կողմից Հայաստանի Հանրապետությանը տրամադրվող աջակցության շրջանակներում համապատասխան ֆինանսավորման համաձայնագրերի շուրջ բանակցությունների իրականացման կազմակերպում, համաձայնագրերի շրջանակներում ստանձնած պարտավորությունների իրականացման ընթացքի դիտանցման ապահովում:

9) Հայաստանի Հանրապետության պետական մարմինների և հնարավոր շահառուների շրջանում ԵՀԳ գործիքների և դրա ներքո իրականացվող ծրագրերի հնարավորությունների ներկայացում, պարզաբանում և մասնագիտական խորհրդատվության տրամադրում:

## **VI. ՎԱՐՉՈՒԹՅԱՆ ՆԵՐՔԻՆ ՍՏՈՐԱԲԱԺԱՆՈՒՄՆԵՐԻ ԱՇԽԱՏԱՆՔՆԵՐԻ ԿԱԶՄԱԿԵՐՊՈՒՄԸ ԵՎ ՂԵԿԱՎԱՐՈՒՄԸ**

13. Վարչության ներքին կառուցվածքային ստորաբաժանումները ղեկավարում են ստորաբաժանումների ղեկավարները:

14. Վարչության ներքին կառուցվածքային ստորաբաժանումների ղեկավարներն անմիջականորեն ենթարկվում են Վարչության պետին:

15. Վարչության ներքին կառուցվածքային ստորաբաժանումների ղեկավարների բացակայության դեպքում նրանց փոխարինում են համապատասխան ստորաբաժանումների գլխավոր մասնագետներից որևէ մեկը, իսկ նրանց բացակայության դեպքում՝ ստորաբաժանումների մասնագետներից որևէ մեկը՝ ստորաբաժանման ղեկավարի ներկայացմամբ:

16. Վարչության ներքին կառուցվածքային ստորաբաժանումների կողմից կազմված գրությունների և այլ փաստաթղթերի նախագծերը դիտասևեռվում են այն անմիջականորեն պատրաստած մասնագետի, համապատասխան ստորաբաժանման ղեկավարի և վարչության պետի կողմից: